

焦太史編輯國朝獻徵錄

焦太史編輯國朝獻徵錄卷之七十一目錄

光祿寺

卿

張泌

郝郁

汪宗鑑

陳煥

張忠

盧宗哲

馮惟訥

少卿

秦玘

李紳

完後

馬從謙

寺丞

丘秉文

署丞

李昱

華理

南京光祿寺

卿

蔚能

楊峻

張賓

王紹

陸泓

項錫

馬理

張袞

敖鯤

四明趙昌期

同校

吳興茅元儀

錢唐徐象標

刊行

焦太史編輯國朝獻徵錄卷之七十一

光祿寺

卿

光祿寺卿張泌傳

實錄

張泌鳳陽潁州人洪武中由太學生授兵科給事中  
和易謹厚勤於職事陞都給事中再陞光祿寺卿在  
光祿二十餘年于御膳必躬視精潔然後以進其祭  
享必潔清宴會必豐美馭下以寬處事以公衆皆服  
之嘗與井泉同發中官陰事 上嘉之特詔兩人有  
犯免死罪二次永樂十六年充讀卷官至七月卒

上悼惜之遣官賜祭命有司治喪具泌容貌豐偉識  
達大體後吏部每奏除光祿官上必問其人得如  
張泌否同時有寺丞仲謙山東黃縣人才能不下于  
泌侍皇太子監國甚見信重兩人相繼卒自是任  
光祿者鮮能及之

光祿寺卿郝公郁墓志

楊士奇

郝君諱郁字文盛世家永平之撫寧文盛自幼父知  
其必貴稍長俾學甫冠有司擇主案牘永樂元年內  
難肅清之後論守城功授陝西咸寧縣丞未行政光  
祿寺典簿授從仕郎持躬勤慎釐務周悉秉謙用和  
厥譽以起陞本寺丞授承務郎益克砥勵時并泉爲  
光祿寺卿恣無忌畏罔上侮下至於儲君亦肆讒間  
文盛盡力彌縫靡有遺闕泉旣以罪黜遂超陞光祿  
卿授亞中大夫賜誥嘉獎贈其大父父皆亞中大夫  
光祿寺卿大母母皆淑人封其妻聶氏淑人郝君感

恩愈篤弗懈凡祭祀供御宴會之事必親視間有疾靡敢遑暇蓋恭事四朝始終一心待遇之厚有加無損正統二年二月以疾卒訃聞賜祭命有司營葬文盛爲人質直坦易無城府居家事親孝撫其從弟勝貴壽盡友愛居官處僚屬和馭下寬平其卒也衆咸悼惜之向使文盛當并泉無狀時稍有分毫混跡或不周於謹豈復有後來此隆遇享年六十有一而官光祿者三十有四年可謂榮矣亦其登諸已者有以致之歟



大理寺少卿進光祿寺卿汪宗器傳 實錄

大理寺少卿進光祿寺卿汪宗器字鼎夫直隸繁昌縣人成化甲辰進士授監察御史巡按湖廣廣東薦賢黜貪得激揚體陞南京大理寺丞進少卿莅獄平恕時劉瑾撓法動多掣肘遂決計以母老乞終養疏凡五上允之特進光祿卿致仕正德四年三月卒宗器襟宇闊爽善談論祿以滑稽縱縱可聽與人交有情誼縉紳多愛敬之

上悼惜之遣官賜祭命有司治喪具泌容貌豐偉識  
達大體後吏部每奏除光祿官上必問其人得如  
張泌否同時有寺丞仲謙山東黃縣人才能不下于  
泌侍皇太子監國甚見信重兩人相繼卒自是任  
光祿者鮮能及之

光祿寺卿陳公煥神道碑

嚴嵩

陳氏世家餘姚以宦業稱公諱煥字子文自號西愚  
曾祖孟雍贈吏部文選司郎中祖雷封彰德府同知  
父廷敬薊州判官公爲湖廣叅政時以太廟恩得贈  
祖及父如其官祖母孫氏母于氏皆贈淑人公初以  
禮經魁浙士旣舉進士授工部都水司主事董漕艘  
于淮丁內艱服闋補管繕未幾疏改南京由南刑部  
主事自外郎歷禮部主客儀制郎中陞廣西右叅議  
雲南提學副使湖廣右叅政江西按察使布政使入  
爲光祿寺卿致仕公天性淳厚居官以仁恕爲心至

義所不可不爲苟同當在淮時 武宗南幸巨關悍  
將從所遇大索賂莫敢違者公曰禍福命也何以賂  
爲弗賂亦不及于禍在廣右分守柳州猺獞出沒爲  
患參將沈希儀領兵界上欲誅之公謂之曰猺不可  
盡雖兵之不能止其患不如諭之義以恩信撫之遂  
與希儀入其境召諸酋長更爲約不犯則賞之諸酋  
長大悅聽令擁輿送出境而不犯柳州滇南士習異  
中土公之教切切惟安貧執義以廉節爲先率之自  
躬士由是知方焉歲己亥今 上駕幸承天所過有  
司或坐供張不具得譴湖廣撫臣以奉迎事檄公公

條其鉅細罔不飭備復奉旨督修 顯陵公殫力程  
工務極壯固稱 上意而諸監視及承事者因緣乾  
沒皆不得肆告成詔進一階有金幣之賜一日渡漢  
江大風兩舟幾覆衆擁公泣公乃命舟人拯溺者活  
數十人竟以無虞任江西獨四年安和寬簡官民便  
之吉水象某者依山阻水恃力與有司抗乃逮至庭  
下察之情人也貸其夾笞之卒改行爲良民所行每  
若是光祿典內府諸饜饍中貴率溢額以需公披籍  
應之中貴頗不便因構語中傷之公於是浩然有歸  
志會歲考察諸大臣例得自陳公稱老乞歸甚懇

上乃可其奏公歸則開園于舊第之西南壘山鑿池  
蒔花木構亭其中中有八景皆以愚名自爲文記  
歲時約里中故舊賓客讌飲相娛樂飲輒至醉醉更  
稱曰愚醉也然則公誠自託于愚者耶其爲士者曰  
西愚公豈真愚耶嘉靖庚戌十二月三日卒年七十  
有三公之所履兩逢 大狩一治 顯陵他人或惴  
惴慮不免而公皆因之以有譽名柳夷之畫宣恩以  
樹威漢江之危急人而忘已吉豪之獄捐文以得情  
蓋仁厚成性而智足以行之閔材遠識固去倫類什  
伯矣

光祿寺卿張公忠墓志

歐陽旦

余官南都時梅江張公知南陵縣余姻黨有爲丞者  
爲余言民俗健訟善訐吏御以機智益詭猾難治梅  
江率其質直不任鉤摘吏民同聲謂之不煩縣以無  
事部使者僉上南陵治行召補內民不能留相與尸  
祝之余以是知公而期其遠到比余壯召公以光祿  
卿致其仕而歸光祿職 上膳饜及宴享諸務與中  
貴相涉檢押少疎卽耗蠹無紀不可勾稽稍正色其  
間輒叢怨納侮譴禍隨之公旣去而僚屬咸思以謂  
裁節得宜乃中貴亦帖帖無所怨者于時公年纔五

十有八余數從公弟翰檢君思訪公病狀謂且復召  
乃嘉靖癸丑翰檢君以苑馬卿入覲率公之嗣子照  
表經謁余銘公墓蓋壬子四月某日公卒矣公諱忠  
字顯父號梅江世居河間任丘長豐里高祖諱丙領  
洪武丁卯鄉薦授都察院司務奏對數稱旨曾祖廣  
有隱德祖政父轍皆以公貴贈中順大夫光祿寺卿  
祖母劉母徐元配張贈封並淑人公自幼穎悟強記  
經史成誦卽不忘九歲屬文有奇語補博士弟子督  
學御史課試數取冠儔輩及見公狀貌凝重進與論  
古今事理人物往往切當益異待之舉嘉靖己丑進



士爲主考大學士羅峰張公所器西樵方公稱其文  
積學有得者由南陵令擢吏部驗封司主事調文選  
司歷稽勳驗封員外郎遷考功司郎中時考察京朝  
官凡流言所毀及當路所不悅必覈其實以贊冢宰  
去留擬改文選郎中固辭擢通政司右通政掌清理  
武臣貽黃正訛補漏不苟尸其官遷南北太僕寺卿  
馬政多所修舉尋轉光祿將晉陟九列而公謝病去  
矣 上厲精綜核惡羣臣推避前後引疾者數被譴  
斥及公得請人以爲忠實之感云公研精經學爲文  
不事雕琢所著有四書釋義詩辯疑及玉林集若干

卷

卷之十一

光祿寺卿盧公宗哲墓志

葛守禮

盧氏其先范陽人也自漢唐以來代有名人世居涑水永樂中名子興者又徙爲德州左衛人子興生斌斌生得得生信信生經配崔氏公之考妣也以公貴封徵仕郎翰林院檢討妣贈孺人封君三子長宗儒次宗賢爲汝王長史公其季也諱宗哲字濬卿以上世居涑自號涑西公生而負俊才有奇質方六七歲從羣兒戲一道士遇之驚曰兒貴人也法至三品少長受里師業工爲文辭諸生莫不避席迺從河間試郡丞姚公文清大器之自謂不及也嘉靖戊子舉山

東省試高等已而第乙未進士 天子躬御文華殿  
授簡試諸進上每奏一卷輒親品第焉得公等三十  
人以爲庶吉士尚方給筆札讀書禁中公故善古文  
歌詩至是大肆其力日益有名當是時李文康公執  
政月試吉士每讀公文未嘗不咄嗟嘆賞也以故盧  
吉士之名大起丁酉授翰林檢討奉迎徵仕君入都  
下會大慶覃恩徵仕君受錫馬旣病卒公當舉省試  
時而丁崔孺人艱至是兩遭重戚皆哀毀骨立人以  
爲難庚子服闋補故官辛丑同考會試所得皆海內  
知名士其後至卿貳者居十五甲辰同修大明會典

丁未擢南京國子監司業會大司成缺公守篆甚久  
念諸生善逸大立要束繩之期不犯然過之甚有恩  
義顧貴遊子弟闕說求出者卽不假貸南雍至今嚴  
之辛亥滿考奏狀闕下時嚴公父子勢熾甚然念公  
留滯南中亦欲稍超擢異之乃公實不持一金予世  
蕃也於是大忤曰先生第還南矣吾行念之公對曰  
某來考績不來講遷官也嚴公慙則以爲南京尚寶  
司卿卽徙通政參議居三年所乃召爲太常寺少卿  
督四夷館丙辰擢南京太僕寺卿寺故開府滁陽  
滁陽者山水名勝之地也往士大夫居是則載酒吟

嘯以爲常公至乃日夜下計郡邑問馬蕃息狀寺有贖金二千或謂公內之例也公笑曰豈有懷金盧溆卿哉竟不內也戊午召爲光祿卿故事光祿上供品物皆權長安中賈人物然不時予其直積負以萬計賈往往破產及公索之藏中乃故有羨金則謂其僚曰夫儻人而不予直是縣官給賈人食物也是主人使僕張空券入市買也迺大發金悉償之當世宗時光祿費鉅公一切裁省諸中人不便謀所以中公上使使往覈之乃知羣閹所爲卒如公規畫久之推爲戶部侍郎嚴公居中持之不報已未朝正旦出至

里第遂病痿痺不起則上書請告以歸公自登第至是侵尋二十餘年官不出寺卿而故同時諸吉士致位公輔者相望然公處之甚遠也及罷歸里中就舊第築室陳几設闌日偃卧其中有賓客故人來則渾棊對語倦則復卧終不請謁守吏卽四方客過其門未嘗不見其下楫也平生所著述甚富然匿不自名一日取其文二十卷焚之子茂從外來望見叩頭流涕公曰雕蟲小技古人以覆瓿孰何至悲也自是無存者公生弘治乙丑二月卒萬曆二年四月年七十七歲爲人嚴毅方正不可干以私然與人交出肺腑相

示天性孝友每遇先忌常於邑流涕竟日至白首不  
渝先人遺產悉以予兩兄天津故有節帥公諸生時  
嘗過之帥見公冠敝適有新冠請易公重違其意爲  
座上一着罷酒仍着故冠而去其介如此後罷光祿  
還也發橐中裝餘四十金則召夫人及茂示之曰此  
吾二十年宦裝可中分之矣茂績學有聲又善治家  
後居積頗饒凡公病卧里中十五年不困乏者茂也  
茂亦有操行伯父長史君病且革呼茂畀之千金茂  
謝不受公喜曰真盧濬卿兒也



光祿寺卿馮公惟訥墓志

余繼登

莊皇帝之壬申三月二十又一日光祿寺卿少洲馮公卒于臨輦以其年十一月二十日葬公于堯山之原越十五年公仲孫琦官太史始以公仲兄海浮先生狀來請銘登謝不敏而重違太史之命乃按狀志而銘之狀稱馮氏之先世爲青州臨朐人高祖思忠徙家遼左復歸於青則公父憲副公始也憲副公有文夫子五人四登科第並以文章政事擅名于時東海馮氏遂有聲於天下公諱惟訥字汝言別號少洲正德癸酉憲副公爲蕭令生公于蕭公生有奇質

手神秀微旣長開敏沈毅辨悟絕倫名起齊魯間一  
試輒受廩領嘉靖甲午鄉薦登戊戌進士庚子除宜  
興令宜興多大猾待吏短長善逋賦有逋至數十年  
者公至刺諸猾搏擊之按籍而攝逋者逋賦大集以  
數萬計輸之郡郡守大奇之謂令纔弱冠耳乃老吏  
不如邑中咸惴惴無敢以少年易公者矣公嘗督諸  
生就試江陰巡江使者某以其間行縣至邑陽怒不  
候已而陰有所覘公若爲弗聞也者弗應也使者愈  
怒撫他事中公調魏令會邊警沓至烽火徹郊關盡  
南震恐公計久遠調經費爲城雙井鎮以備之未幾

遷蒲守魏人擁車下不得發乃爲更定牧馬法而去  
蒲劇州多宗室紛遷難治公治之甚容與暇嘗進博  
士弟子俾執經問難爲剖疑義士爭奮勵舉於鄉者  
視昔三倍之乙巳晉丞維揚而公尋以外艱歸服闋  
補松江遷南京戶部員外郎郎中壬子丁內艱復補  
北駕部出爲陝西僉事分巡隴右兼督學政在鎮五  
年武備文教種種悉飭邊圉無事陞河南右叅議分  
守河北壬戌擢浙江提學副使公念兩浙士風爲海  
內嚆矢廣布條教以示左質右文之意士習翕然咸  
歸於正癸亥陞山西右叅政卽自其省爲按察使公

既秉憲一以覆明裁之吏民見者語次尋釋皆得其  
陰伏廩然無所受私三晉號曰神君丙寅陞陝西右  
布政使秦中多豪強馳騫閭閻錮屯田之利令籍不  
得稽公乃以法按其豪大搜諸伏田得萬餘頃事聞  
受白金文綺之賜戊辰轉江西左布政使藩司總錢  
穀日入以巨萬計吏弊蠲集公爲立抽名驗收之法  
額外無毛髮餘羨宿弊頓祛江右歲輸諸瓷器及它  
經費甚夥皆當出于民又吏緣爲奸公私困耗公乃  
議令民畝出一錢以給諸務而諸絕簿書盜財物者  
率以輕重受刑遠近便稱焉辛未入覲闕下精覈

下吏能否無所依違天官郎丞稱之曰諸方伯考覈  
言事鑿然有執不存兩可者獨馮伯也是歲諸方伯  
去位者過半公名益起縉紳大夫咸以公輔期之而  
公請老之志堅不可挽矣疏上天子惜之特進光  
祿寺卿予致仕云既歸始構室墾田習靜遠覽爲終  
老計而天不憖遺不踰年逝矣公天性孝友歷官所  
至皆奉太夫人以行卽倥偬夜歸必徐候戶外問寢  
食然後退其奔喪也徒跣數千里外柴毀逾禮兄弟  
之間自相師友友愛備至教育諸孤無異所生以至  
宗戚閭黨緩急皆以時周之咸得其歡心交游天下

悉當時聞人相與考德問業各取所長然性嚴重不  
可以私仕宦三十餘年圖書詩卷外無長物督浙學  
時大學士袁公遣官致書謝而不發其介如此幼服  
庭訓用康平爲理所至吏民畏而愛之在魏有德政  
碑在蒲在隴右有去思碑在江右則士大夫嘆服謂  
二百年所未見若小民又人人肖像于室飲食必祝  
矣生平嗜書無所不讀每政暇卽手一卷不置博涉  
而深思閑積而約取發爲文章溫淳爾雅古歌詩取  
則建安近體在天寶大曆之間所著有風雅廣逸楚  
辭旁註選詩約註漢魏六朝詩紀文獻通考纂要唐

音翼杜律刪註馮光祿詩集若干卷行于世史登曰  
立功立言古今勝事志士杰人畢力而趨者也然徇  
俗之士往往不顧才質之有限官無崇卑必靳卓詭  
業無工拙必靳表炫至強役其心以爭兼能之勝猶  
惛然用力日勞所至日誦公少通仕藉循資累級數  
十年始長藩司而一旦棄去如脫屣結髮供文詞凌  
厲作者而冲雅和平無一切瓌奇競勝之氣舉世所  
共艷羨者一不入其心故操之無所強而出之常有  
餘不求聲而名我隨不務勝而人我歸可謂有道者  
矣

光祿少卿秦公玘墓志

彭華

公諱玘伯玉其字蘄州世家祖定鴻臚寺序班父諱  
遂昌馬步閑巡檢贈戶部主事進光祿寺少卿母李  
氏封安人贈宜人公正統丁卯領順天鄉薦景泰甲  
戌登進士巡檢公以疾歸尋卒丁艱天順丁丑始授  
戶部江西司主事辛巳丁李宜人憂甲申改光祿丞  
成化壬辰九載績最進少卿辛丑又九載加正四品  
祿仍舊職蓋未幾而不起矣公爲人勤慎處宮雖不  
赫赫沽名而始終如一事無廢弛在戶部典錢穀出  
納惟公在光祿幾二十年歷卿五六人未嘗有失色



數數與中貴接能不激不隨以克有濟吏部嘗兩擬  
爲南京光祿卿名皆上聞而竟不得於時同年在朝  
者皆官三品而公獨遲遲如此豈非命邪公生宣德  
丙午八月二十六日年五十有六

光祿寺少卿李君紳墓志

李東陽

李氏世居徐之沛縣後徵至京師隸錦衣衛籍君諱紳字縉卿其自號曰抱犢山人生而朗潤數歲能屬對人爭誦之嘗與予從御史岐山展先生遊並被甄賞君長予三歲舉成化乙酉鄉貢連捷丙戌進士授行人司行人數奉使足跡徧天下聞見益博九載考最遷戶部員外郎郎中贈其父道明員外郎封母周氏爲太宜人並受誥命其所領司最劇書簿立辦時貴戚方盛有所干請力爲摧抑尚書李公敏薦爲光祿寺少卿意氣勃發遂罹猜忌會考嚴京朝官以浮

跡例調知山西之忻州忻君所嘗奉使地方不欲往  
上疏乞致仕再上未允復疏曰郡縣之職非循良愷  
悌者弗稱茲以浮躁淺露之名而責其循良愷悌之  
政益亦難矣既得請榜于座曰五斗懶將雙膝屈三  
章乞得一身閒論者賞其志因惜其才之不盡見也  
君舊居城南徙禁籞西偏已乃復故業間歸沛置  
屋數楹歲取俸直忽燬於火又無他貿易歲費且不  
給持以勤儉未嘗見言面喜讀道書手自抄錄至盈  
箱篋或訝之笑而弗答與客觴咏技壺戲象或雜以  
諧謔文采逸發獨不及官府事予叩之琅琅可聽使

得再試未必不斬然特著也 今天子登極詔進階  
朝列大夫至是卒君素篤恩義兄玄爲道士晚得未  
疾迎於家躬視湯藥歛葬如禮丁氏妹寡而無子周  
卹備至嘗爲友索草書久弗致續木屬三日以幅楮  
抵予必得乃已交接之際蓋至成不易云君生正統  
甲子五月卒正德己巳十二月年六十六

光祿寺少卿史君後傳

張璧

知山光祿寺少卿史君也諱後字異仲其先出漢外戚平臺侯玄平臺凡四傳至諱崇者以東漢佐命功封溧陽侯因家溧陽之南埭元季有諱升祖者徙下莊遂成世業曾祖文祖鎬父祚號慎齋贈南京刑科給事中母郝氏贈孺人繼母王氏封太孺人知山少時已屹然負壯志嘗從里中兒嬉爲御史按部狀慎齋公見輒驚喜曰兒他日必亢吾宗乃命名御郝孺人喪知山方九歲哀號哭踊如成人見者爲之酸感稍長學文援筆立成同儕稱實時戴恭簡公督學南

畿大奇之乃簡入學爲諸生以名倒置憲銜不可復  
改日後無何慎齋公卽世知山哀毀若不能生凡喪  
祭綜綜合禮度旣免喪益窮覽墳籍受學于姑蘇都  
御史礪菴毛公學日進遂以易領成化丙午應天鄉  
薦尋遊太學適丘文莊公爲祭酒大甄收望士重許  
可累試寘首選弘治丙辰登進士高第觀政戶部松  
露周公甚器重使江南稱旨丁巳擢南京刑科給事  
中南科官不備設體甚重知山至則以言責自任數  
彈刺有戚畹家以貴幸不奉法度上章數其罪又言  
中官宜罷典兵政語侵權嬖京師地震率同官疏弭

災數事言言剴切嘗奉命給軍衣閱帑藏巡視禁門  
中官校卒皆怖慄相戒莫敢犯會 孝宗皇帝信任  
臺諫知山與大宗伯楊月湖少司空徐北屏同在諫  
垣相感激言事識者方望其有爲而知山以滿考納  
祿歸矣既歸督耕課子闢園結亭蒔花聚石爲樂隱  
具諸所題扁悉取陶靖節集中詩意以見志 今上  
改元名公鉅人有論薦必及知山知山嘆曰某今得  
適林壑足矣不願再仕也朝廷重違雅志擢知山今  
官致仕云知山愈亦俯仰自適有泉石終焉之趣家  
故豐饒然自奉甚簡歲荒民窘則亟賑資恐後癸未

江南北大侵道殣相望知山惻然傷之急糶米千斛  
於南都爲糜粥食餓者又出二千斛以給邑人貧窶  
當是時富家相爭匿財惟知山敦義首奮人以爲難  
巡撫李梧山上其事詔再進朝列大夫益章厥義風  
百姓也知山事太孺人孝謹凡意所在將順無違與  
伯兄樂山君友愛樂山君卒知山哭慟撫其遺孤若  
已出晚年置義田義塾爲宗卹計性方梗不曲意下  
人然坦易直諒與人交豁如也家庭義方爲教故其  
子漸成鉅器云生成化戊子正月卒嘉靖丙戌十月  
年五十有九家居南都時名頌如白巖柴墟白樓雙  
溪諸君子往還個酌爲詩社所著有知山  
稿慕陶集歸得園集處因稿皆雅雅可傳



光祿寺少卿馬公從謙墓志

陳愷

公諱從謙字益之別號竹湖其先河南人晉時諱訓者爲南海郡守隨元帝南渡始家溧陽是爲馬之始祖隋唐五季代不乏人至宋廷鸞公拜相恥與史彌遠同列歸老於家廷鸞公曾孫子富遷居覽橋河東子富生裕公曾祖也元亂弗仕祖賢以子清貴贈文林郎父忠年六十餘始生公公幼岐嶷簡默不同羣兒遊府君指謂太宜人趙曰是亢必亢吾宗恨吾弗及見也後果以公貴贈光祿寺少卿公弱冠爲邑庠弟子員遂馳儁譽中值家難公泰然居之曰此其藥

石免我于疾疢者乎益與兄性魯姪一龍肆力問學  
入北雍文日益有名六館士莫敢先者嘉靖辛卯中  
順天鄉試第一乙未舉進士授都水主事分署彭城  
飭興修令以廉公自持始徐梁牽夫編各州縣不習  
水性每歲被溺者不計舊有公田歲入粟若干斛涖  
事者以爲公費公會其贏縮儼州官司其出入以粟  
募民能水者充役無事則已有召則千夫卽集有餘  
以賑州民之顛連無告者至今頌公德焉二洪之石  
突兀而出千態萬狀蹲踞水中舟觸立碎公捐俸募  
石工去其爲害者遂成安流銓曹賢之移官主客主

容主四方賓貢先時夷人至必挾彼方物求市譯者  
爲之交易率自利其十五而復以贖物與之夷情不  
平公廉其弊繩之以法夷大悅服秩滿遷尚寶司丞  
有朝貴僞造牙牌而佩者公欲上其事同列難之公  
曰吾職符璽此尚可隱乎章上卒議如律 今上以  
制誥重典命輔臣選才學者一人專掌之會推公學  
行起草簡入內閣司內外制 天子以冊儲臣工咸  
得膺封贈之榮公代言典重有體諸以潤筆遺者却  
之 扈 駕大狩承天詔諭多出其手還奉命之衡  
厝行冊封禮贖贈一無所受王甚敬之明年冬陞光

祿寺少卿兼翰林院五經博士典制如故命甫下奔  
太宜人喪枕塊三年未嘗見齒釋服仍拜原官辭內  
閣職躬校簿書大自尚食糾至廩餼醪膳靡不綜理  
雖宿巧蠹者斂不敢肆有輔臣貪墨誤國疏論之留  
中不下人皆爲公慮公不少悻時上好玄修盛興  
齋醮日費數千金其提督中官怙勢窟穴其中侵冒  
以巨萬計公疏暴其罪并諫止齋醮比入爲其黨所  
抑及向所論輔臣陰嗾之指爲誹謗遂廷杖歿之實  
壬子十二月十二日也未卒數日前獄中出書教諸  
子曰吾罪在不貸聖明不以顯辟歿且不朽汝等

其自勉樹母息且諭散粟帛以與宗族親故竟不及  
家事可謂就成從容者矣公生弘治乙卯壽五十八  
性孝友事太宜人則敬養成則敬思嫡兄某天性  
猛悍凌轍無所不至人皆不堪而公獨順受之至老  
不較一言官至卿貳出入猶親扶之與弟從言家居  
必同食或不至雖食不樂也每有所需輒濟之卽傾  
囊弗吝也建家廟捐義粟族人有事卽面折是非不  
令片紙煩官府教子弟以義方嘗作二則於廳事左  
曰訓右曰戒各十四言凡夫脩己治家處人經世之  
道畢備矣處鄉黨敦厚正直人皆敬而親之有告者

曰某人田與公田鄰可得也公正色曰使吾盡田吾  
邑亦必有鄰吾田者吾安能盡人之田乎終其身不  
多置產南昌萬爲無錫令公明廉慎爲豪右所謗誤  
聞于直指使者將刺之公偶過會言其事公力諍其  
良有司遂改薦之萬知其故追至宜興持幣謝公閉  
門拒竟弗與通大抵公性直諒樂與人爲善人有過  
亦必面叱之不可假借人不敢干以私家居雖盛暑  
必衣冠危坐平生不苟言笑暇則課子弟辨析經疑

讀古文辭商確古人賢否居常不卸衲履不邇歌舞  
泊如也詩文汪洋闊肆扣于精鑿追跡作者論天下  
事據古證今鑿上若指諸掌如漕河禦戎條論諸篇  
時輩推服焉所著有竹湖小集若干卷藏于家

光祿寺丞丘秉文傳

丘秉文字鳴周御史山之曾孫父茂樞舉人秉文少穎慧弱冠卽喜古文辭登嘉靖甲辰進士初除浙之永嘉令以憂歸補長興政尚簡易簿領稍暇輒以聲律目娛察廉遷爲比部主事會車駕郎楊繼盛條劾分宜相嚴嵩罪惡十餘事天子以其事連東宮繫之西獄相嵩先後令人密諭西曹郎故折辱苦之郎客相嵩門下者爭希指以求媚秉文獨時時具橐饋于楊遇楊病輒佯爲已病具藥餌潛與之事具載楊自著年譜中旣遷光祿丞給事中楊允繩劾奏寺

丞胡胄侵奪諸不法事胡遂謬拾楊不根事以中之云尤繩私訕 主上熒惑左道日費大官錢數十萬胡出示其草秉文面折之曰君具疏第辨誣足矣何至以謾詞上干 天子乎倘事出不測如國家無容諫之度何胡銜之已而冢宰李默爲趙文華誹奏繫獄分宜相子世蕃遂指秉文爲李黨因以災異策免李善人倫又好獎引後進秉文以省郎丞光祿也實李自以意用之世蕃久專中外事銜李擅用里子不先啓事首相以故秉文坐黜時事出不意諸親知官京師者爭往唁秉文曰吾受知李太宰李今坐繫卽



不能援亦宜投劾行寧能珮珂旦夕過李絲綫所不  
仰天一疾呼乎遂以單騎卽日出崇文門歸時年四  
十有四構東樓藏書數百卷結社于西州之頂咏罷  
輒頽然自適人莫之測也秉文操筆敏捷談聲律妙  
悟入玄語時事間憤憤不辨與人交懇款冲挹以故  
人樂與之親恨不終身事之也年五十八卒所著詩  
文各若干卷又有評點品彙註解文選二帙長興徐  
中行以詞賦名比部時與秉文爲同舍郎以文章交  
最至秉文歸徐數千里函寄遺稿續文獻具載之

光祿寺大官署署丞贈徵仕郎慎齋李公昱墓

表

劉龍

陝西苑馬寺丞李君堂自平涼函表入賀既竣事過  
予愬曰昔吾祖光祿署丞歿王事吾父以衣冠爲莽  
痛之終身以及于堂餘六十年於茲矣歲時展謁墓  
次輒悽愴不勝若吾祖有在顧未有以表之茲實先  
人志而堂之責也敢以煩執事按公諱昱字文昭號  
慎齋世爲潞州人天性剛毅篤於爲義慷慨自許動  
以古人爲法治尚書領宣德乙卯鄉薦卒業太學屢  
會試不偶已而授光祿寺署丞正統己巳扈從

英廟陷於虜庭虜人欲用之公曰主辱臣死死有重於泰山有輕於鴻毛顧自處何如耳今日固吾死所也不屈遂遇害尋被卹典進階徵仕郎贈父昂如其官母及妻俱封孺人廕子淳入監讀書其制詞有曰人孰不死惟死于國事乃爲榮也嗚呼君臣之義無所逃于天地策名委質死生以之故殺身成仁舍生取義見危授命臨難毋苟免聖賢垂訓不一而足以此防民猶有背漢臣虜忍恥偷生而甘心犬羊者甚矣亂臣賊子不可勝誅也靖康之變李侍郎若水以扈從死節卽爲虜人所重名耀史冊流芳百世公豈

其苗裔與雖卒以非命而守死善道爲朝廷所嘉榮  
及存者受賞已厚至子淳歷汝寧揚州推官高堂同  
知孫堂以鄉薦宰宜君遵化而擢苑馬父子接武仕  
途功名烜赫爲鄉閭延譽則天之報公者亦未嘗不  
豐也節義人之大閑歿於其職亦惟成就一是而已  
初非有所爲而爲之顧獲福之隆如此然則節義何  
負於人人亦何憚而不爲哉愚故表之以勵風化云

光祿寺署丞華君理小傳

文徵明

華尚古名理字汝德嘗仕有官稱以其仕不久又性好古遺其官不稱稱尚古生尚古生常之無錫八出南齊孝子寶之後世累高貲不仕至濟時甫以貲爲郎後以二子升朝累贈光祿署丞戶部主事尚古其次子也少積學與弟珏俱隸學官爲弟子員刻厲自奮旣而珏舉進士去爲吏部稽勲郎中而尚古七試輒斥循資貢禮部卒業太學選授光祿寺大官署丞大官掌內庭法膳供具浩穰而事關中禁倉卒皆從中涓取辦其徒率饗誠驕揚往往憑恃爲姦利稍不

厭所欲輒能中人以法尚古周慎詳雅而潔廉自將  
又平實沈厚見者沮喪訖其去無有過舉一時卿僚  
方重得尚古而尚古歸矣其後有司復援恩例起之  
卒辭不就蓋尚古仕雖晚而輒知止足又樂閒曠既  
家居率以良時勝日領客燕遊南昉錢唐北盡京口  
數百里中名山勝境靡不踐歷遐矚高寄黯然興思  
有古逸人之風家有尚古樓凡冠履盤盂几榻悉擬  
制古人尤好古法書名畫鼎彝之屬每併金懸購不  
厭而益勤亦能推別真贗美惡故所畜皆不下一品  
時吳有沈周先生號能鑒古尚古時時載小舟從沈

先生游互出所藏相與評騭或累旬不返成化弘治  
間東南好古博雅稱沈先生而尚古其次馬尚古家  
居孝友而接物闊朗未嘗督過人古稱長者尚古有  
馬尚古今年七十有幾先未有子以稽勲之子鉦爲  
子晚得一子名鑄予家吳門與錫比壤頗聞諸華之  
盛其間餽德植義固多有之要不若尚古生之篤意  
古人也尚古所藏古名人文集若古人理言遺事古  
法帖總數十費皆數百千不惜又喜散財利物而不  
求知主名其事皆有足稱者然固富人有識者所能  
可以不書其大者以傳

南京光祿寺卿蔚能傳

以下南京

實錄

南京光祿寺卿蔚能陝西朝邑縣人以吏員授光祿  
典簿累陞本寺卿進禮部右侍郎後以忤旨調南京  
光祿寺卿成化二年八月卒賜葬祭如例能雖出自  
吏胥然有執持盡心職任每朝廷有宴會輒躬自檢  
視品嘗之必豐必潔否則責其職掌之人自能去任  
後所用多科貢士然皆以清流自居不屑細務每歲  
時宴饗廷賜飲食輒粗惡不中口爲外吏所嗤能在  
光祿三十餘年未嘗私持禁鬻還家其尤爲人所稱  
道者能偕同僚聯名上疏請查入內供應器皿有



旨下禁獄問所由能私謂少卿輩曰 上怒不可測  
某老矣獨任之諸公方駸駸進用母相累也既而獨  
受責降官調南京未嘗有後言論者以是多之

南京光祿寺卿楊峻傳

實錄

楊峻字惟高江西進賢縣人成化丙戌進士授丹徒知縣陞監察御史歷廣東按察司僉事以父喪去服闋改福建汀漳兵備陞浙江按察司副使按察使有坐報父讐抵灰者峻以篤於孝竟釋之尋陞浙江右布政使鎮守中官方橫取于民督及有司峻面數其罪取鐵索欲相與拘繫詣京勢乃稍戢陞南京光祿寺卿歲進酒以軍民轉運後期多敗者屬吏往往獲罪峻請命巡倉者監之始無宿累遂著爲令弘治末引年乞休正德八年六月卒賜葬祭如例峻爲人剛

毅政事精敏居官能守廉儉素之茹在家人有不堪者居與縣隣致仕十年足跡不一入縣門親終時廬墓至老生日不爲宴飲接後進必以正論誨迪鄉邦稱之

南京光祿寺卿致仕進階通議大夫楊公峻墓

志銘

毛澄

弘治癸亥南京光祿寺卿進賢楊公以年至七十上疏乞致仕上許之特詔給驛歸鄉里一時士大夫多惜公弗究其用以去既又從而高其志榮其歸相與咨嗟歆羨若不可及也公諱峻字惟高別號玉峰

楊之先自關西隋末散處江上公七世祖孟顥仕元  
令南豐因家進賢曾祖榮壽祖仲文父某以公貴封  
文林郎雲南道監察御史母陳氏封孺人公于兄弟  
行三幼穎拔日誦書數百千言總角補邑庠生御史  
韓公雍按部小試甚奇之景泰癸酉以書領鄉薦卒  
業北雍執經門下者多出爲顯宦其未達者亦率以  
經學名成化丙戌舉進士授丹徒令寬嚴並用惟其  
所當旣踰年百廢具興如造江船築驛路水陸便之  
壬辰擢雲南道監察御史奉勅清理湖湘軍政摘發  
姦隱雖數十年莫能逃戊戌擢廣東按察司僉事南

蒞任猶賊爲梗巡撫特委軍前閱功禪贊居多有文  
綺寶鏹之賜巡嶺南有千戶濫殺冒功事露逃匿有  
司繫其僕于獄且二十餘年矣部臺文案委積皆言  
處亾公鞠其妻無戚容疑之密遣人踪跡所在得之  
廣城竟伏辜癸卯丁內艱服闋改福建按察司杭州  
盜起鎮巡以公有風力薦爲兵備撫捕有方民恃無  
恐丁未擢浙江按察司副使辛亥進按察使修舉憲  
度先其大者不屑屑校細微癸丑入覲擢浙江左布  
政使浙爲大藩公夙夜盡心規畫剔蠹宣滯軍民利  
病以身任之丙辰丁外艱服闋仍補浙江浙之人士

聞公復來則大喜於是部使交剡旌舉而銓曹亦有  
巡撫鄖陽山東之薦竟弗果辛酉進南京光祿寺卿  
凡供具賦額悉減於舊寺歲進酒十萬瓶軍民轉運  
稽程屬吏往往獲罪公聞於上命巡倉者監之乃  
無宿累遂著爲令復上章言廣聖恩恤宗族數事及  
得謝歸躬督諸孫治經暇日卷不釋手篇詠時出壯  
氣不衰乙丑以登極恩進階通議大夫正德丁卯冬  
子恭甫以常州守勘事忤逆瑾逮繫詔獄公亟走家  
丁以中法俟命爲戒壬申公割其田產均畀族姻之  
貧者其卒爲甲戌六月距生宣德癸丑春秋八十一

公爲人方嚴有遠識而才優於大平居儼然終日與  
人情至不悅以辭色縉紳士以是重之然愠於中者  
多其不及柄用卒坐此性孝友親終廬墓至老生日  
不爲飲宴處兄弟始終無間言篤於故舊盛衰如一  
樂成後學雖疏且微必有誨退休以來每感時事有  
不如意者輒噫吁不已若身在其位云

南京光祿寺卿張公賓墓志

崔銑

張公世爲山東單縣平堙里人後兵起獨仲祥者一  
他徙仲祥生宗道宗道生肅肅生珙張公珙長子也  
諱賓字廷賓成化戊子年三十舉鄉試乙未舉進士  
丙申授睢寧知縣以憂去服除改金壇甲辰遷監察  
御史奉旨寧夏盤糧巡山海關及按真定弘治庚戌  
遷湖廣按察司僉事又以憂去服除改山西戊午遷  
浙江副使乙丑遷江西按察使正德丁卯遷南京光  
祿寺卿明年廷臣薦公爲大理寺卿劉瑾用事怒公  
無餽遺內批致仕公魁幹大度質直而謙無飾言僞



行凡與交者無不遠去疵吝頽然服焉知睢寧時歲  
大水發廩賑饑或勸其待報公曰穀爲民積今爲民  
發之罪令自當也金壇又大水以全災報都御史怒  
曰若爲民吾其殃民者哉卽如報賦安所出命他官  
驗實乃上九分災公抗言曰民重溺而匿之不仁也  
告之不以實不忠也民將孳矣尚安言賦猶坐謀報  
罰穀睢寧廟灣村民庶而多狡猾公禁之皆改行立  
集以日相遞食貨得流後多富者居常廉知貧富強  
弱之等役與賦自第之爲御史劾太監蔣琮伐山陵  
木爲室琮幸臣也疏入不報巡山海立社學使行伍

皆知書守備劉某貪殘有內援案之寘於法湖廣知縣某素佞得幸上官後訟都御史下公治且曰此官賢其罪當坐訟者公竟罷之都御史怒公坐是久不調御史寧陵喬恕按江西方嚴能斷省府畏之禮詔言甘公至將衣豸見或勸其更他服公曰此吾命服也如面君又何如耶每與御史論事更端則起請已坐盡辭御史不說同官同公間道御史意公曰禮貴於盡吾亦嘗爲御史爲臬司更三省矣禮如是可也知足恭求說哉御史他日以事管掠省吏或以咎公公曰吏自有罪且吾一人耳目有限難保其不敗法

耶布政林某謁御史趙公亟止之曰柰何以藩長而  
效驛官也久之御史薄林而賢公既薦於朝每言必  
稱之嘗同三司入賀晉府諸王及將軍皆走問曰孰  
爲張僉事吾聞其人忠也諒公司刑久明決而平恕  
句客有獄十五年矣每上要囚輒不服是後囚請於  
御史願下金壇知縣治死而無恨御史曰彼非我屬  
也囚泣下曰他官喜賂故使某寃不白今江南清官  
獨金壇耳御史乃轉白他御史下金壇事果得理在  
山西斷文水二氏田治平陽藩府暴橫者民德之江  
西最健訟一訟必逮數百人幻詞織事誣善伸枉得

利則自承反坐公一切以平恕治察詞鑒色叅伍以  
驗其情別其輕重之等然後辟之是時寧庶人恃才  
挾詐御三司如輿隸其尉坐事求公未減恃術鉗公  
卒不撓寶雞張撫爲湖廣按察使撫字世安持行廉  
布衣食蔬公廩厪足食卽挈其餘內於帑或以貽賔  
戚天下稱曰青菜張然好詭行微名君子高其節而  
枉其心副使俞振于暨僚皆疾毀之焦少師芳爲僉  
事獨右撫公無所附常兩釋之後世安大感悟執手  
流涕以謝江西副使蔡清林廷玉皆行義士一日相  
詬欲相擊也詣公第求直旣見悔愧不敢言而罷囊

城張淮爲御史按雖寧民狀公善政公襁狀遣民御  
史適見之意其爲告昧者召民訊實公孫曰此市民  
獻諛求後庇爾今患無政無患無聞御史嘆曰忠哉  
斯令彼刻石表稱者民其勞乎山西省城北十里廣  
袤百里無水公相地得井王公鴻儒欲紀之公不可  
在湖廣於劉家隔作橋又作度蟻橋民作張公德政  
坊公見而毀之在浙攝長入覲副使趙某謂曰公垂  
索如京何以見諸貴人乎公鄉人知府于鳳喈聞而  
有獻也不納公素貧能不苟取未冠時夜讀書鄰女  
就之叱令去旣貴無妾媵自奉如寒士尤薄勢利曰

官豈一家物哉盡吾忠斯可矣彼以官爲家者豈未  
之思耶秦襄毅公紘爲公姻兄尚柄用時弗通問  
司徒公少常從公游後司徒公貴司徒公長子策名  
進士出守吾郡公每以忠廉勸郡守廉直而才名位  
駿盛矣必曰此吾父暨吾張公之教也公距生正統  
己未十一月卒正德丁丑十二月年七十有九

南京光祿寺卿王紹傳

王紹字繼宗永阜人舉弘治癸丑進士授南太常寺  
博士擢監察御史巡按貴州蠻夷劉五支黨復逆公  
兼軍督戰單騎論賊大義衆皆羅拜解散時閣瑾忌  
公出陝西按察司副使尋轉參政本省廉使由陝西  
右布政使轉浙江左陞南京光祿寺卿考績北上次  
徐州遇病懇允致仕值歲大疫公捐俸輸粟顧醫存  
活者十之七嘉靖己丑詔進大中大夫有司備儀問  
勞月廩歲力因題其堂曰清朝存問大司馬蘇公祐  
論略曰公宅鄉也有陽道州之化服官也同黃次公

之良勇退也追錢宣靖之風垂範也等陳太丘之賢攝生也得張計相之法歸田也負文潞公之望觀化也齊安樂公之達歷年也幾伏博生之遠祿位名壽遐出流輩生榮歿哀備享全福可語不朽矣



南京光祿寺卿陸公淞神道碑 羅欽順

公諱淞字文東號東濱姓陸氏生四年能誦詩屬對  
稍長從師受業潛心誦習絕不嗜遨嬉充邑庠弟子  
員文思溢發迥出儕輩弘治己酉舉浙江鄉試第一  
明年第進士觀政吏部家宰王端毅公嘗試以直己  
守道論奇之間延入齋閣與論經史以疾謁告歸益  
肆力問學甲寅還朝授禮部儀制主事遇事必謹守  
成憲貢舉條貫有未備者嘗以大宗伯命增修之時  
稱其能三載考最俄丁父憂服除仍舊秩時逆瑾用  
事嘗欲有所私公執不可瑾怒遂中公以事下之獄

公怡然不以爲悔竟亦無他兩充會試提調官事皆  
嚴辦戊午陞祠祭員外郎諸貴近有所營建求得勅  
額必祠曹出每逢事已致饋公輒辭陞主客郎中曹  
事倍繁處之若無事然者日本使者宋素卿本華人  
賄瑾求數入貢以使其私公力言遠夷來去無常非  
中國之利因請執素卿以正國法事遂寢瑾亦不悅  
陰令人伺公所爲卒無隙可抵已巳陞光祿寺少卿  
平物價時收納禁需索羣下無所售其姦瓶壺舊取  
諸酒家公議易之以憎遂不煩督貢而集遭內艱去  
官服除北上道陞南京鴻臚寺卿歲時朝陵有曠于

禮者輒糾之仍請著爲令 武宗親征逆藩駐蹕南

都一切禮儀禮部皆與公參酌而行無弗允嘉靖改

元公陳言十事曰篤孝敬親儒舊隆日講廣言路振

紀綱辨賢佞節財用清刑獄崇朴素擇守令 上嘉

納之癸未春陞南京光祿寺卿諸務多涉中官羣小

憑之奸竄百出公悉懲之以法而振理其朝綱奏停

歲釀酒十萬瓶歸其材于北寺以免轉運公務勞費

大省舊患滯下至是增劇乃再疏乞休溫旨許還那

調理示將復用報垂至而公卒矣嘉靖甲申四月也

年五十有九計開賜諭祭葬公體質凝重性沈靜寡

言笑事親能以志養居喪哀毀外舅無子養之終其身葬已復爲之立後而撫視無間遇人以誠未嘗違詐交遊有過恒極口規正之爲詩之務中繩尺好古而不泥有集若干卷藏于家

南京光祿寺卿項公錫墓志

歐陽旦

公諱錫字秉仁項姓其先益汴人從宋南渡居嘉興者諱秀公十世祖也入國朝祖太保襄毅公忠以文武才累官大司馬功在史氏公高祖吳江丞邦曾祖衡皆用司馬馳恩贈左都御史父經仕至江西右叅政公幼敏讀書輒善記時學憲祝虛齋先生致仕居海上有幼女襄沒公造其廬求聘焉且曰吾孫可教也遂學春秋于虛齋虛齋精研理奧而公潛心師說時時靜坐深思發爲文辭俊雅親切虛齋每喜項甥善學同業者亦自謂不及項生也正德丙子以太學

生舉順天鄉試嘉靖癸未登進士授令建陽建陽閩  
劇邑稱難治公恭儉愛人敦崇風教臺臣交薦賢能  
擢刑部陝西司主事究心法比傅以經義聲著西曹  
戊子請告歸侍參政公養孳丁艱服除補刑部福建  
司主事看詳諸司章奏吏曹有欲薦公自代者公遜  
謝之語浸聞於人人愈重公甲午改尚寶司丞久之  
晉少卿尋晉南京鴻臚寺卿居三載晉南京光祿寺  
卿光祿職內羞羣璫穴奸藪蠹莫可稽省公補欲剪  
剔衆口輒相螻蟻時宰造不悅公坐免歸公初拜命卽  
欲乞骸朋游交沮非其志也卽得謝築室郊墟榜其

堂曰歸來傍水丘林徑間多植花樹時時肩輿小艇  
惟意往來風清氣和則數從賓朋歡飲歌嘯連日夜  
不厭人以爲得止足之樂焉嘉靖癸丑閏三月以痰  
疾卒距生弘治庚戌十月年六十有四

南京光祿寺卿谿田馬公理傳 薛應旂

公諱理字伯循陝西三原人恬于仕進唯欲明農學者稱爲谿田先生初以春秋中弘治戊午鄉試再試禮闈未第游太學與呂涇野崔後渠諸公交相切劘而文章德義名震都下高麗使人亦知慕之錄其文以歸乙丑喪生母庚午又喪父先後衷毀筑然祥禫中會檢三禮編集成書唯是戊辰辛未皆不預會試

名重外夷

安南貢使問禮部主事黃清曰關中馬理先生何尚未登仕籍其名重外夷若是至甲戌科復上春官公卿以下咸欲識面四方學者至聚觀之乃以詩中式



及殿試策問大學衍義公對略曰大學之書乃堯舜禹湯文武之道也傳有克明峻德湯之盤銘堯舜帥天下以仁之語真氏所衍漢唐宋之事非大學本旨又曰真氏所衍止於齊家不知治國平天下皆本於慎獨工夫德秀宋儒其所造大率未精以此失代問者之意置二甲授稽勲主事改文選與郎中不合引疾告歸者三年戊寅復任值武廟將南巡公與黃鞏諸同志伏闕極諫雖受廷杖駕亦遂止未幾送母劉淑人還鄉乃設教于武安王祠藩臬諸君爲建嗟峨精舍以居生徒劉卒後尋起轉考功郎中丙戌例

當考察外官時內閣冢宰各挾私忿欲去廣東河南  
陝西三省提學公乃昌言曰魏校蕭鳴鳳唐龍今有  
數人物若欲去此三人請先去理由是獲免公之保  
全善類如此丁亥陞南通政赴任過河池見驛丞貌  
類黃鞏者問之乃其弟肇叔開也公卽泫然淚下旣  
乃作詩贈之有六年復見先生而爲過河池見叔開  
之句蓋公舉禮闈寔鞏所取生與同官旣師事之歿  
後猶依依若此戊子引疾告歸辛卯陞光祿卿卽起  
公于家故事凡解事百需先關節中官否則留難人  
甚苦之公至釐革宿弊德望所孚雖中官亦無敢梗

者癸巳既病歸林下者十年癸卯復起公南光祿而  
公年七十一矣引例陳乞乃得賜歸卽隱於商山書  
院諸生問道者遠近踵集公山中野服鶴髮童顏望  
而卽之飄然仙風道氣也如是者又十餘年而公始  
告終嗚呼賢人君子代不數人公生國家全盛之時  
鍾河華英靈之氣所稟固已不儿而一時聲氣相應  
者又多理學之士宜其直接橫渠以沂濂洛爲世大  
儒也公嘗謂見行可之仕唯孔子可以當之學聖人  
者當自量力故公每出不一二年卽歸歸必十數年  
而後起綽綽然于進退之間雖欲磨涅者亦末如  
之何也

南京光祿寺卿張袞傳

實錄

南京光祿寺卿張袞直隸常州府江陰縣人正德十六年進士改翰林院庶吉士授監察御史改翰林院編修與修會典尋充經筵講官并日講大學衍義九年秩滿陞侍讀校對累朝實訓實錄成陞左春坊左諭德晉侍讀學士加四品服色掌南京翰林院事遷太常寺卿掌國子監祭酒事坐諸生頒曆延序失儀左遷南京太常寺少卿尋陞光祿寺卿致仕嘉靖四十二年三月卒於家上追念其經筵史局効勞特賜祭一壇給金葬

南京光祿寺卿南溟敖先生鯤墓志銘

葉向高

吾師敖南溟先生者當萬曆初爲御史是時江陵柄國諸臺諫多濡足其後引繩批根罕有得免益十九以江陵敗矣其不以江陵敗者則必磽礧儼皦以江陵名者也而吾師爲江陵門下士容與其間不亢不隨世莫能議涉孟門太行之途而無傾軛失楫之患於乎豈不難哉方先生以孝廉入成均江陵時爲司業試先生第一大嗟賞之引爲知己比同朝自旅見外無私造謁按圖而舉其所嫌若習太史蔡比部不

少卻顧江陵亦不忤也江陵沒而先生由御史爲大理丞晉少卿再晉南京光祿卿方向用而先生沒矣先生名鯤字化甫別號南溟臨江新喻人其得姓自楚若敖氏後散處四方其在江右顯者纍纍而先生曾大父資詳大父審和父維琛皆隱德不仕維琛以先生貴贈監察御史配贈孺人黃氏年五十舉先生衆咸異之先生少卽警敏疑重善屬文伯兄大叅蒙泉公中丞梅坡公咸賞識之弱冠補弟子員試輒高等戊午舉于鄉監試徐公嘆曰茲卷文醇而字楷無一畫苟必端人也三上春官不第至戊辰乃第授松

江府推官故相國徐文貞公丞以老成練達稱先生無何丁贈公艱歸補懷慶所至持平恕不尚鉤摘人咸德之部使者屢以最薦召入拜御史奉命按長蘆監課長蘆分部放廣弊竇最多先生按行稽察夙蠹一清比代去所修交游緝紳饋問視故事一切減殺諸同事者皆以爲難已復按福建按順天歲已卯編建鄉試士先生實監臨之百凡慎志每卷必竟閱親爲品題榜中官詞林者今已四人而向高其一也順天在輦轅下事多掣肘先生持大體無所撓屈貴戚憚之不敢以私干太宰某公以私人囑列薦劾先生

不聽太宰敗先生亦不以語人也其介特有執又不  
近名大率類此生平坦易無城府與人油油然卽與  
隸亦不輕詈見之者皆以爲可親三按劄郡士民望  
見輜車輒歎然喜其來乃先生固未嘗有更張創建  
求赫赫功其下吏奉約束甚謹無敢欺負而先生亦  
未嘗峻其威稜以搏擊爲能不肅而成不嚴而治不  
言而成蹊其先生謂哉沒而學使者采公論祀之學  
宮生嘉靖庚寅九月卒萬曆丙戌八月得年五十有  
七